

Saksbehandlar: Birte Tuxen Bø, Næringsavdelinga
Sak nr.: 14/6894-4

IT-forum 2014 – søknad om tilskot

Fylkesrådmannen rår hovudutvalet for plan og næring til å gjere slikt vedtak:

1. Sogn og Fjordane fylkeskommune støttar arbeidet til IT-forum Sogn og Fjordane med kr 500 000 i 2014. Tilskotet vert dekkja med avsette midlar i plan og næring sitt budsjett for 2014.
2. Fylkesrådmannen set nærare vilkår for tildelinga gjennom eige tilskotsbrev.

Vedlegg:
Søknad IT-forum

SAKSFRAMSTILLING

Samandrag

IT-forum Sogn og Fjordane søker fylkeskommunen om kr. 500 000 for 2014 som eit bidrag til spleiselaget i fylket innanfor IKT-arbeid. Tilskotet vil bidra til å sikre samordning og iverksetting av strategiane vedtekne av representantskapen i IT-forum og til sekretariatsarbeid for Nasjonalt Breiband.

Fylkesdirektøren for næring er styreleiar i IT-forum, og fylgjeleg ugild etter forvaltningslova § 6 e. Det er difor fylkestrådmannen som tilrår i denne saka. «Underordna» kan likevel stå for sjølve saksførebuinga, og saka er greidd ut av tilsette ved næringsavdelinga.

Bakgrunn

IT-forum Sogn og Fjordane er eit breitt samarbeid og spleiselag som skal sikre at Sogn og Fjordane er i fremste rekkje i å utnytte IKT i næringsliv, offentleg sektor, opplæring og utdanning. IT-forum utfører eit omfattande arbeid med å initiere, samordne og sikre viktige utviklingsaktivitetar til nytte for heile fylket. I 2013 støtta fylkeskommune arbeidet til IT-forum Sogn og Fjordane med kr. 500 000.

Organisering

IT-forum Sogn og Fjordane har vore aktivt sidan 1995, og har gjennom denne perioden hatt aukande tal deltakarar, og har gitt ei lang rekke konkrete og tydelege resultat som har profilert fylket som ein sentral aktør innanfor IKT-utvikling. Resultata har bidrege både til utvikling av nye arbeidsplassar, nye tenester, nye breie samarbeidsnettverk og ny breibandinfrastruktur i fylket. Medlemmane av representantskapen er pr. årsmøtet i 2014:

- Sogn og Fjordane fylkeskommune
- Fylkesmannen i Sogn og Fjordane
- Sogn og Fjordane energilag
- Helse Førde
- Innovasjon Norge Sogn og Fjordane
- Sparebanken Sogn og Fjordane
- Lerum AS
- Sparebanken Vest
- NHO Sogn og Fjordane
- Sogndal fotball
- Lotteri- og stiftelsestilsynet
- Hydro Aluminium AS
- KS Sogn og Fjordane
- Kunnskapsparken i Sogn og Fjordane
- Høgskulen i Sogn og Fjordane
- Vestlandsforsking

Med desse 16 hovudmedlemmane frå ulike sektorar representerer IT-forum ei stor og viktig fylkesovergripande samordning av IT-satsingar i fylket. Ansvar for å vere initiativtakar, samordnar og pådrivar for utviklingsaktivitetar er definert i mandatet:

"IT-forum skal ta initiativ til, vere koordinator for og pådrivar for aktivitetar som fremjar rasjonell og utviklingsretta bruk av informasjons- og kommunikasjonsteknologi (IKT) i næringsliv og offentleg sektor, og dergjennom for innbyggjarane, i Sogn og Fjordane. Det skal særleg arbeidast for å styrke og utvikle samhandling og samordning mellom etatar, organisasjonar og bedrifter i Sogn og Fjordane."

Konkrete resultat av arbeidet

Aktivitetane i IT-forum har gitt betydelege dokumenterbare økonomiske resultat. Breibandsatsinga i fylket er eit godt eksempel på dette. Her har IT-forum gjennom undernettverket Breibandforum vore både initiativtakar, felles prosjektutviklar og samordnar av aktivitetar i Sogn og Fjordane til ein verdi av rundt 250 mill. kr til utvikling av infrastruktur og innhaldstenester. Alle kommunane i fylket har vore involvert og gjennom dei har også både næringsliv og innbyggjarar fått effektar av breibandutbygginga.

Sogn og Fjordane fylkeskommune si støtte til Breibandforum og IT-forum har utløyst eit stort spleiselag der både kommunar, næringsliv, statsetatar, utdanning og forsking har bidrege, og der fylket har hatt stor suksess med å konkurrere om nasjonale midlar. I løpet av 2014 fekk samarbeidet i fylket gjennomslag for to søknader til den nasjonale utlysinga i regi av Post og teletilsynet med ei utteljing på 39,5 mill. kr. Dette er ei fem-dobling frå dei 7-8 mill. kr som Sogn og Fjordane tidlegare har fått tilført, og Sogn og Fjordane var fylke nr 2 i landet på utteljing etter

Nordland. Dette kunne ikkje ha skjedd utan samarbeidet som har vore utvikla gjennom mange år i IT-forum Breiband.

For utvikling av tenester har både eHelsesamarbeidet (no endra namn til Velferdsteknologi) og skulesamarbeidet hatt ein tilsvarande brei involvering av heile fylket. I eHelsesamarbeidet har alle kommunar i fylket gjennomført ei stor og viktig mobilisering for og systematisk utrulling av meldingsutveksling innanfor triangelet "kommunal pleie og omsorg – legekontor - Helse Førde". Som eitt av dei første fylka i landet var alle kommunane i fylket i gang med denne meldingsutvekslinga sommaren 2014. Satsinga har vore driven gjennom to prosjekt "Meldingsløftet for kommunane i S&Fj del 1 og del 2" støtta m.a. av fornyingsmidlar hjå Fylkesmannen.

Prioriterte fellesaktivitetar i 2014

IT-forum har gjennom drøftingar og prioriteringar i styret og representantskapen vedteke strategiar for satsing knytt til dei ulike gruppene og nettverka. Planen blir revidert på kvart årsmøte og følgd opp av styret.

Styret i IT-forum for 2014 er:

Jan Heggheim, Sogn og Fjordane fylkeskommune - leiar
Gunnar O. Hæreid, Fylkesmannen i Sogn og Fjordane
Gunn Aase Moldestad, Sparebanken Sogn og Fjordane
Terje Heggheim, KS Sogn og Fjordane
Arne Myrekrok, Serit - Fjordane IT AS
Marit Gjerstad, NHO Sogn og Fjordane
Erik Kyrkjebø, Høgskulen i Sogn og Fjordane

For 2014 er fellessatsingar i høve til undergruppene i IT-forum følgjande:

Breiband

- Breibandforum følgjer opp strategiplan for breibandutbygging vedteken av Fylkestinget i Sogn og Fjordane (S&Fj).
- Forumet vidarefører stimulering/utbygging av breiband i S&Fj med særleg vekt på neste generasjon breiband med fiberteknologi.
- Breibandforum følgjer opp utlysinga av nasjonale breibandprosjekt frå Post og teletilsynet med sikte på å få med kommunane i Sogn og Fjordane i eit fellesprosjekt med Sogn og Fjordane fylkeskommune som søker.
- 23 kommunar vart med på fellessøknaden som vart utvikla i løpet av første halvår 2014, og dei to hovudsøknadane fekk totalt 39,5 mill kr frå Post og teletilsynet i tilskot.
- Breibandforum følgjer opp ferdigstilling av prosjekt i kommunane som har fått midlar frå tidlegare ordning (før 2014) med midlar frå KMD via fylkeskommunen.
- Arbeider vidare med påverknad av nasjonale styresmakter for å sikre meir og større finansiering til breibandutbygging. Nedskjeringa av breibandmidlar til 50 mill. kr på framlegget til Statsbudsjett for 2015 er særleg alvorleg og mykje arbeide må setjast inn i slutten av året for å rette opp i dette både for 2015 og for seinare år.
- S&Fj var ein pådrivar for etableringa av Nasjonalt Breibandråd, og har også teke på seg å vere sekretariat for dette i ein første fase. Dette forumet er viktig både for å arbeide for meir breibandmidlar og for å gje innspel til eit nasjonalt utlysingsregime som er i tråd med behov i fylket.

Leverandørnettverk

- Gruppa er etablert som møteplassen for dei nye private IT-bedriftene i Sogn og Fjordane og vil bli følgd opp og vidareutvikla.
- Gruppa har endra namn frå Digitalt entreprenørskap til Leverandørnettverk vinteren 2014 sidan den har fått ei breiare samansetjing og at leverandørrolla til bedriftene har fått større

merksemd. Offentleg innkjøp er ein stor og viktig marknad for verksemdene, og det er særskild viktig at verksemdene har god kunnskap om korleis å kunne bli leverandør og korleis dei eventuelt kan samarbeide for å nå opp i konkurransen med nasjonale leverandørar.

- Dialogkonferansar er eit nytt verkemiddel som lagar arenaer der lokale offentlege innkjøparar og næringsliv kan møtast på eit tidleg tidspunkt i ein utbyggings- og innkjøpsprosess. Då kan leverandørane kome med innspel og legge grunnlag for betre tilpassa utbyggingar, og offentleg sektor kan på eit tidleg tidspunkt orientere om kommande innkjøp.
- Velferdsteknologi er no eit særleg aktuelt tema for dialogkonferansar mellom verksemdene og lokale innkjøparar. Eigne seminar både om offentlege innkjøp, samarbeid mellom IT-bedrifter og om velferdsteknologi spesielt blir gjennomført i 2014.
- Nettverksaktivitetar vil også bli vidareført på andre område prioritert av verksemdene.

Velferdsteknologi

- Gjennom satsinga "Meldingsløftet i kommunane i Sogn og Fjordane del 1 og 2" er S&Fj kome i fremste rekkje i landet i høve til utrulling av elektronisk meldingsutveksling mellom kommunar og legesenter og spesialisthelsetenesta. I løpet av sommaren 2014 var alle kommunar i fylket operative.
- IT-forum vidarefører denne satsinga ved å bruke same organisering for velferdsteknologi. Dette er tenester og teknologi som støttar eldre og personar med særlege behov slik at dei kan bu lenger i eige husvære. Tenestene kan også vere aktuelle i ulike institusjonsplassar. Satsinga involverer ei rekkje tema som teknologiutvikling og integrering, organisasjonsutvikling, tenesteutvikling, kvalitetssikring av tenester, sikkerheit, personvern og etikk.
- Arbeidet starta i 2014 og har fått stor merksemd og interesse. Arbeidsgruppa omfattar no både Flora kommune, Eid kommune, Gloppen kommune, Kompetansesenter for heimetenester (fylkesovergripande) i Førde kommune, Eid vidaregåande skule, Fylkeslegen i S&FJ, NAV/Hjelpemiddelsentralen og Vestlandsforskning. I tillegg er Høgskulen i S&Fj og Helse Førde knytt opp mot arbeidet.

Oppvekst og utdanning

- Vidareføre nettverket på tvers av skuleslag (grunnskule, vidaregåande skule og høgskule).
- Bidra i årleg IKT-konferanse for skuleverket i desember.
- Strategiarbeid for muleg koplingar til nye innhaldstenester og betre bruk av nye medier.

Teknisk drift og utvikling

- Vidareføre felles kurs og nettverksaktivitetar.
- Arbeide vidare med mulege teknologiske tema knytt til den nye konferansemodellen Næringslivsdagane i S&Fj.

Etter innspel frå Fylkesmannen sitt "Stat-næringsamarbeid" og drøfting på årsmøtet i IT-forum, har IT-forum også laga ei skisse til eit program i Innovasjon Norge for kompetanseutvikling i næringsmiljø. Skissa vart i august levert til ein to-steps prosjektkonkurranse. Skissa vart vald ut for vidare utvikling i september 2014, og full søknad skal utviklast til midten av november 2014. Dersom denne prosjektsøknaden blir finansiert, vil arbeidet med kompetanseutvikling i næringsmiljø bli ein ny vesentleg aktivitet i 2015. Næringsmiljøet blir representert gjennom IT-forum, og Høgskulen i S&Fj vil ha ei særleg rolle som tilbydar av kompetanseutviklingstiltak.

I 2014 vidareførte IT-forum den årlege IT-forumkonferansen med 199 deltakarar på Sunnfjord Hotell i Førde. Konferansen fekk bra med merksemd i media og vart også streama i samarbeid med elevar frå vidaregåande skule. Konferansen har vore halden sidan 1995, men vil frå 2015 inngå i Næringslivsdagane i Sogn og Fjordane og vil bli arrangert i mai. Målet er å samordne og kople fleire tidlegare konferansar og bli den største innovasjonskonferansen i fylket.

IT-forum vil i utgangspunktet stå for ein halv dag av plenumsdelen i den nye konferansen, men vil også kunne utvikle parallelle sesjonar for spesielle tema. IT-forum vil bidra i utvikling og gjennomføring av den nye konferansen i dialog med programkomiteen. Leiar i IT-forum er med i den nye samordna programkomiteen.

Økonomi og finansiering

IT-forum utfører eit betydeleg arbeid med overvaking av status og behov for IKT-utvikling i fylket, med initiering og samordning av strategiar, handlingsplanar, oppfølging og støtte til arbeidsgrupper og nettverk og iverksetjing av felles utviklingsprosjekt. IT-forum har også eit betydeleg utadretta arbeid for å profilere IT-arbeidet i fylket og for å arbeide for at finansiering og satsingar frå nasjonalt nivå kjem Sogn og Fjordane til gode. Breibandsatsinga er no eit særleg godt eksempel på dette.

IT-forum har bygd aktivitetane rundt ein finansieringsmodell der kvar av medlemmane av representantskapen bidreg med kr 10.000 i kontingent pr år, IT-forum-konferansen tilbakefører overskotet til fellesaktivitetar, vanlegvis rundt kr 50.000 pr år. I tillegg har Sogn og Fjordane fylkeskommune bidrege med eit tilskot.

Tilråding

Fylkesrådmannen tilrår at IT-forum vert støtta med kr. 500 000 for å utføre sitt mandat i 2014. Midlane vert dekkja med avsette midlar til IT-forum i budsjettet til plan og næring for 2014.